

ҚАЙРАТКЕР

4-бет



ҮКІМ БҮГІН
ОҚЫЛАДЫ...

8-бет



ЗАҢ газеті

✉ zangazet@mail.ru

№36 (3567) 19 мамыр 2023



ZANMEDIA.KZ

Қоғамдық-саяси, құқықтық газет

БҮГІНГІНІҢ БАС ТАҚЫРЫБЫ

БАҚЫТТЫ ШАҢЫРАҚ – БЕРЕКЕЛІ ҚОҒАМНЫҢ МЫЗҒЫМАС ТІРЕГІ

Астанада отбасы институтын нығайту және рухани-адамгершілік отбасылық құндылықтарды дамыту мен насихаттауда ата-аналар қауымының белсенді рөлін арттыруға арналған «Ұрпақтар сабақтастығы» атты республикалық ата-аналар форумы өтті. Оған ата-аналар комитеттері мен қоғамдық ұйымдардың, мемлекеттік органдардың өкілдері мен сарапшылар қатысты. Форумға қатысушыларға Мемлекет басшысы құттықтау жолдады.

(Соңы 2-бетте)



СӘТІ ТҮСКЕН СҰХБАТ

Анар ФАЗЫЛЖАН,
А.Байтұрсынұлы атындағы Тіл білімі институтының директоры:

«ТІЛСІЗ – ҒЫЛЫМ ДА, БІЛІМ ДЕ, ТАРИХ ТА, ӘДЕБИЕТ ТЕ ЖОҚ»

– Қоғамда ғылыми-зерттеу институттары елдің дамуына үлес қоса алмай отыр деген сын көп айтылады. Бұл қаншалықты негізді деп ойлайсыз?

– Сіз өте жақсы сұрақ қойдыңыз.

Қоғамдық гуманитарлық салаға, соның ішінде тіл білімі, тарих, әдебиет, археология, шығыстану бағытында еңбектеніп жүрген ғалымдарға жаратылыстанушылар зерттеулеріңіздің маңызы жоғары емес, неге сіздерге сонша қаражат төленуі керек деген әңгіме айтқанын естіп қалатымын. Әрине, бұл бірді-екілі болған жайт. Дегенмен, осылай ойлайтындар бар дегенді білдіреді. Бұл гуманитарлық ғылымдардың мәнін, қоғамға беретін пайдасын түсінбеуден туған пікір. Мен гуманитарлық ғылымдар ішінде тілтаным үшін жауап берейін. Қазір жаһандану заманы дейміз ғой. Жаһандану дегеніміз – мәдени және экономикалық құрмаласу. Біз интеграцияны құрмаласу деп алып жүрміз. Мұндай құрмаласу кезінде ұлттық мәдениеттер жаһандық бірегейлікке қарсы оппозиция құрады. Өйткені жаһандық бірегейлік адамзаттың барлығынан бір ғана сана иелерін, тұтынушылық қана санасы бар тобырды құруға әкеп соқтыруы әбден мүмкін.

(Соңы 5-бетте)

ПАРЛАМЕНТ

ҰЛТТЫҚ ҚАУІПСІЗДІК БАСТЫ НАЗАРДА

Қаңтар оқиғалары еліміздің күштік құрылымдар жүйесінің, олардағы лауазымды тұлғалар мен қызметкерлердің кәсіби біліктіліктері мен міндеттеріне адалдықтары ғана емес, азаматтық ұстанымы мен патриоттық сезімі үшін сынақ әрі ащы сабақ болғаны даусыз. Мемлекет басшысы Қасым-Жомарт Тоқаев былтырғы жолдауында ұлттық қауіпсіздік жүйесін түбегейлі қайта құрудың маңызын атап көрсеткен болатын.

Бүгінгі таңда елімізде осы маңызды іске түрлен салынғаны белгілі болып отыр. Саланы қайта құрылымдау, қауіпсіздіктің жаңа талаптарын айқындау, оларды жүзеге асыратын кадрлар құрамын тазалап, біліктілік деңгейін көтеру, жауапкершілігін арттыру бағытында жүйелі жұмыстар басталған сияқты. Бұл ретте Мәжіліс депутаттары айрықша белсенділік танытып жатқаны белгілі болды. Халық қалаулылары ұлттық қауіпсіздікті нығайтуда тиісті құқықтық базаны одан әрі жетілдірудің қазіргі жаңа геосаяси жағдайда да аса өзекті екенін ескеріп, «ҚР кейбір заңнамалық актілеріне ұлттық қауіпсіздікті қамтамасыз ету және Қазақстанның арнаулы мемлекеттік органдарындағы қызмет мәселелері бойынша өзгерістер мен толықтырулар енгізу туралы» заң жобасына бастамашы болыпты. Бұл құжат осы дүйсенбіде өткен Парламент Мәжілісінің

жалпы отырысында палатаның қарауына шығарылып, жан-жақты талқыланды.

Алқалы бас қосуда заң жобасын оның бастамашыларының бірі Халықаралық істер, қорғаныс және қауіпсіздік комитетінің төрайымы Айгүл Құспан қорғады. Айгүл Сайфоллақызының айтуынша, заң жобасында ұлттық қауіпсіздік қағидаттары біршама өзгерген. Бұл адам құқығы басымдығы принциптерін еш жоққа шығармайды, керісінше, оларды Конституцияға сәйкестендіретін болады. Заң жобасы бойынша 2 кодекс пен 11 заңға енгізілетін өзгерістер негізінен ұлттық қауіпсіздікті қамтамасыз ететін күштердің заманауи сынақтарға дайындығын арттыру, осыған қатысты заңнамадағы кейбір олқылықтарды жоюды көздейді. Бұл ретте бірінші кезекте қорғаныс-өнеркәсіп кешені ұйымдарын стратегиялық объектілерге жатқызу және қорға-

ны пен қауіпсіздік мұқтажы үшін қажетті тауарлар мен қызметтерді сатып алу кезінде сыбайлас жемқорлыққа жол бермеуге септігін тигізетін өлшемдер де қарастырылды. Айгүл Сайфоллақызының айтуынша, осыған орай мемлекеттік қорғаныс тапсырысын орындаушыны таңдау рәсімін тек конкурстық негізде және ашық жүргізу ұсынылды. Сонымен қатар, қорғаныс-өнеркәсіп кешенінің кәсіпорындары жекешеленген күннің өзінде де мемлекеттік бақылауында қалдырылатын талап енгізілді.

Екінші жаңалық арнаулы мемлекеттік органдар қызметкерлерінің қызметтік тәртібіне, біліктілігіне және әлеуметтік қорғалуына қатысты енгізілді. «Қазақстан Республикасының арнаулы мемлекеттік органдары туралы» заңның қолданыстағы редакциясында қызметтік тәртіпті сақтау міндеті басшыларға ғана жүктелген екен. Енді арнаулы мемлекеттік органдарда қызметтік тәртіп үшін жауапкершілікті тек жеке-дара бірінші басшыларға ғана емес, барша бөлімше басшыларына да жүктеу көзделіп отыр. Бұған қоса, барлық басшыларға ұлттық қауіпсіздік органдарының кадр құрамын патриоттық рухта тәрбиелеу және құқық бұзушылықтың алдын алу міндеті тапсырылмақ. Жеке құраммен жүргізілетін

бұл жұмыс ұлттық мәдениетке, дәстүрге, мемлекеттік тілді білуге, жауынгерлік рухты нығайтуға, ұжымдағы оңтайлы, адамгершілік моральдық-психологиялық ахуалды сақтауға бағытталатын болады.

Үшінші жаңалық діни экстремизмнің алдын алуды заңдық тұрғыдан реттеуді көздейді. Қолданыстағы заңнамаға сәйкес, мемлекеттік және жергілікті атқарушы органдарға лаңкестікке тойтарыс беру, оның салдарымен күресу ғана жүктелген. Оның діни аспектілері мүлдем қарастырылмаған. Айгүл Құспанның айтуынша, аталмыш шараларға қоса діни экстремизм мен терроризмнің алдын алу, оған қарсы ақпараттық жұмыс шараларын да естен шығармай, оларды жүйелі түрде жүргізу қажет. Осы себепті лаңкестікке қарсы комиссия шеңберінде жергілікті атқарушы органдарға – діни экстремизмнің алдын алуды жүзеге асыру жөніндегі өкілеттік берілуі тиіс. Ал Лаңкестікке қарсы орталық осы жұмыстарды үйлестіріп, оған бас-көз болуы қажет. Заң жобасын дайындауға барлық мүдделі мемлекеттік органдардың өкілдері қатыстырылып, олардың ескертулері мен нақты ұсыныстары ескеріліпті.

(Соңы 2-бетте)

